

四庫全書

史部

欽定四庫全書

史部

欽定大清會典則例卷十三
四

詳校官檢討臣劉炘

編修臣程嘉謨覆勘

總校官原任中允臣王燕緒

校對官中書臣呂奕棟

謄錄監生臣陸維新

欽定四庫全書

欽定大清會典則例卷十三

吏部

考功清吏司

期限

一在京衙門事件期限康熙四十六年定部院事務每月將已未完結之處造冊分送六科科鈔並見理事事件造冊分送各道勘對限期有遲

延違誤者察叅將遲誤之人照遲延例分別議處注銷冊內遺漏事件者照失察案件例罰俸兩月行察月日難結情由不行聲明及已經聲明尚有舛錯朦朧者照行察未結槩稱已結注銷例罰俸三月。又議準各部院承辦科鈔事件凡行詢各部及外省不能依限完結者於每月注銷冊內將行察緣由逐一聲明如有行察未結之案槩稱完結注銷者察出將承辦注銷

之人照文卷舛錯例議處。雍正十二年定部院一切應行文字事件均於到司五日之內即令行文其有訛誤舛錯之處未經察出者將專管直日之漢司官照文卷舛錯例議處至於應行文字事件遺漏未行或遲延日久滿漢各官均難辭咎應將滿漢各官一并察叅遺漏未行者照例罰俸兩月再各部院衙門彼此文移均兼清漢嗣後如字內有舛錯訛誤之處未經察出並

將專管直日之滿司官照例議處。又議準各部院咨文事件於文到之日該司務廳按日登紀號簿呈堂標到部日期分發各司該司又按每日所收咨文注明日期定彙即將原咨黏連彙後並於彙內將咨文到司日期注明如有辦理遲延者該堂官計日扣限易於稽察如有行察各衙門者亦令按次詳載以憑察覈。乾隆五年議準各衙門具題事件以交繕本處日期

為止九卿會議事件以九卿上班日期為止如
應行察者承辦衙門除去咨詢日期按限完結
遲延一日至十日者罰俸一月十日以上罰俸
三月二十日以上罰俸六月三十日以上罰俸
一年該堂官於屬官逾限事件自行察叅者免
議倘逾限既未完結又未察叅經別衙門察叅
如承辦官罰俸一月者堂官免議承辦官罰俸
三月者堂官罰俸一月承辦官罰俸六月者堂

官罰俸三月承辦官罰俸一年者堂官罰俸六月。十四年奉

旨嗣後各部事件在本部題結者吏禮兵工等部及各衙門均定限二十日戶刑二部定限三十日行察會彙繫吏禮兵工及各衙門主彙者定限四十五日戶刑二部定限五十日內所會各衙門各定限五日戶刑二部定限十日逾限即行叅處。十五年

諭嗣後各該衙門支領文移遇有不兼清漢及一切
應駁事件皆令收文之員回明堂官移察本處並
將移文之員畱待咨覆收文處不得隨收隨駁無
可稽考如此則察覈尤為詳密而作偽者無所容
將此永著為例欽此。十六年戶部覆準各衙門
如有自行奏準工程及事非常格外支領等項
務將辦理緣由備具清漢文移報明戶部戶部
驗確即知會該衙門出具印領委官齎赴戶部

覈對相符然後劄庫給發。十七年議準部院衙門各司屬中移付事件凡有闕題奏等案均照各衙門會彙定限移覆付督催所稽察照例注銷

一稽察八旗事件乾隆二年覆準凡各旗都統叅領所辦事件有未妥協以及遲延者稽察該旗御史不行察出叅奏別經發覺者將察旗之御史照不行詳察例罰俸六月倘有瞻徇情面

明知錯謬不行叅奏者照徇情例降二級調用
○三年定稽察內務府衙門並上三旗之御史
亦照稽察八旗之例不必逐年更換如該御史
有升遷離任等項事故即令新補之人辦理稽
察倘有遲延違限該御史察出題叅將承辦之
郎中員外郎等官及徇隱之內務府總管均照
事件違限例議處如該御史徇隱不叅照不據
實陳奏例降一級調用

一筆帖式繙譯限期雍正元年覆準各部院繙
譯筆帖式於漢蒙既定後限一日即行繙譯繁
難者限二日具稟說堂倘有誤承辦事件記過
一次再有犯者將該筆帖式即行革退倘有串
通經承洩漏招搖等弊將該筆帖式與經承一
例治罪

一各省承辦

欽部事件限期康熙九年議準凡

欽部事件以文到之日為始通限以四月具題其兼
管二省之總督所管隔省事件限以六月具題
陝西總督所管甘肅兩廣總督與廣東巡撫所
管瓊州雖繫本省地方相隔寫遠應照隔省例
限以六月具題臺灣遠在海中限以十月具題
其承辦官已經辦理完結申詳督撫督撫具題
遲延所有違限月日專責督撫計月處分不得
分坐道府州縣等官。又議準督撫違限一月

者罰俸三月違限二月者罰俸六月違限三月者罰俸九月違限四五月者罰俸一年違半年以上者降一級畱任違一年以上者降二級畱任違二年以上者降三級調用。十五年議準承辦

欽部事件各官均照定限辦理完結如案情繁重限內必不能完結者承辦官將此情由申詳督撫題明展限如承辦官將易結之事遲延不結或

將難結情由不豫行申詳督撫經督撫題叅雖
期限未滿及逾限不及一月者將承辦官罰俸
三月至逾限一月及一月以上者不論事件已
結未結將承辦官罰俸一年督撫計月處分○
乾隆十五年奏準官員辦理

欽部事件逾限不及一月完結者比照逾限不及一
月事未完結罰俸三月之例量為酌減罰俸一
月○又奏準凡接扣限期均請於初叅限滿之

日接扣二叅限期不得以接到部覆之日始行
起限致滋延展

一督撫展限康熙二十二年議準督撫監臨科
場日期準其按日扣限隔省出境者準令題請
展限若在本省內不準展限。二十三年議準
督撫新任接署者均以接署日期扣算原限四
月者準展限兩月原限六月者準展限三月完
結。又議準布政使暫行護理巡撫印務者不

準展限。乾隆三年覆準凡通行各省督撫妥議等案或應博採輿論或應相度情形必須轉行所屬詳悉妥議申報該督撫始能彙覈咨題及至各屬察覆到齊該督撫彙行詳定或有未協之處又須駁詰往返均需時日嗣後凡通行各省督撫提鎮按伊本地情形詳悉妥議察議案件各該督撫於四月六月正限之外若事理易結者準其展限兩月事理難結者準其展限

四月該督撫分別咨題事件按限完結。十五年奏準通行各省察議事件凡專行一府一州者限四月完結原屬寬嚴允協毋庸酌減請將通行各府州察議事件易結者定限六月之外不準加展兩月其難結者六月之外加展兩月完結不準展限四月至有不需地方官察議在省司道可以覈定聲覆者若照四月扣限未免延緩應酌減兩月以兩月扣限題咨

一邊遠展限康熙九年議準各省苗疆繫邊遠
地方承辦事件於正限外展限兩月。又題準

廣東瓊州

欽部事件限六月具題命案於六月正限之外準展
限兩月。乾隆十五年議準廣西苗疆潯州府
屬之武宣縣南寧府屬之宣化縣橫州永淳縣
柳州府屬之馬平縣雒容縣柳城縣羅城縣融
縣懷遠縣象州來賓縣思恩府屬之賓州遷江

縣上林縣慶遠府屬之思恩縣共十六州縣湖南苗疆永州府屬之道州寧遠縣永明縣寶慶府屬之邵陽縣武岡縣新寧縣辰州府屬之沅陵縣瀘溪縣辰溪縣溆浦縣沅州府屬之黔陽縣麻陽縣郴州屬之桂陽縣桂東縣宜章縣興寧縣靖州并靖州屬之會同縣澧州屬之永定縣桂陽州并桂陽屬之臨武縣藍山縣二十二州縣細察情形與內地無異不準展限其餘仍

照舊加展

一應結事件故為駁詰乾隆四年覆準凡部院將應結之事駁詰者如各該稽察之科道衙門察出叅奏交部將該司官罰俸六月堂官罰俸三月。又議準凡議敘案件一案之中有一二字重複錯誤原卷可以察明者即察明改正準與議敘不得藉端駁詰及巧為需索如有濫行駁詰者將承辦之員察明題叅照應結駁察例

議處如有不肖官吏藉此需索者訪明嚴叅交部治罪

赴任

一文憑定限康熙九年議準各官

命下後將文憑用印移送吏科填限給發。又議準官員赴任呈繳文憑時該布政使察明部科印信限期相符者即行咨繳或有油痕水跡破損等項不得駁回倘仍有書吏藉端需索等弊許

本官據實詳報該上司即行究處。雍正七年
議準各官自京赴任及在原籍赴任計道里遠
近酌量憑限造冊移送吏科順天限十日奉天
限三十日直隸限二十日江蘇省江寧常州鎮
江限四十五日淮安揚州限四十日蘇州松江
限五十日安徽省安慶寧國限五十五日池州
太平廬州限五十日徽州限六十日鳳陽限四
十日山東省濟南兗州東昌青州限三十日登

州萊州限四十日山西省太原潞安汾州大同
寧武朔平限三十日平陽澤州限三十五日蒲
州限四十日河南省開封歸德彰德衛輝限三
十日懷慶河南限三十五日南陽汝寧限四十
日陝西省西安延安限五十日鳳翔漢中限五
十五日甘肅省平涼鞏昌限五十五日慶陽寧
夏臨洮限六十日西寧涼州甘州限七十日浙
江省杭州紹興寧波限五十五日湖州嘉興限

五十日金華衢州嚴州限六十日溫州處州台
州限六十五日江西省南昌饒州廣信建昌南
康撫州臨江瑞州袁州限六十日九江限五十
五日吉安限六十五日贛州限七十日南安限
七十五日福建省福州興化泉州邵武限八十
日延平建寧汀州限七十日漳州福寧限八十
五日臺灣限百有十日湖廣省武昌漢陽德安
襄陽限五十日安陸鄖陽黃州荊州限五十五

日湖南省長沙常德限七十日岳州限六十五
日寶慶永州限八十日衡州辰州限七十五日
四川省成都限八十日寧遠夔州限八十五日
順慶限九十日敘州重慶限九十五日保寧限
百日雅州限百有五日龍安限百有十日廣東
省廣州肇慶限九十日韶州南雄限八十日惠
州限九十五日高州限百日廉州雷州限百有
五日潮州瓊州限百有十日廣西省桂林平樂

限百日柳州慶遠梧州潯州限百有五日思恩
南寧太平泗城限百有十日雲南省雲南臨安
楚雄澂江廣西曲靖武定東川烏蒙限百有十
日姚安大理景東順寧鶴慶蒙化永昌永北元
江開化限一百十有五日廣南麗江威遠鎮沅
限百二十日貴州省貴陽思南鎮遠都勻平越
安順南籠遵義限百日思州限九十五日石阡
黎平限八十日銅仁限九十日威寧限百有五

日其八品以下在籍候補候選及在外推升例
不引

見官員將文憑封發督撫驗看給發者除將發憑到
省日期扣算外應以得闕省分與原籍原任地
方比較遠近定限順天至奉天山東山西河南
均限三十日江蘇湖北陝西均五十日安徽浙
江均五十五日江西六十日湖南甘肅均七十
日福建四川均八十日廣東廣西均九十日貴

州百日雲南百有十日奉天至順天直隸均限
三十日山西五十日山東河南陝西均六十日
湖北七十日江蘇安徽江西浙江甘肅均八十
日湖南九十日福建四川均百日廣東廣西均
百有十日雲南貴州均百二十日直隸至奉天
山東山西河南均限三十日江蘇湖北均五十
日安徽五十五日浙江陝西均六十日江西湖
南甘肅均七十日福建四川貴州均八十日廣

東九十日廣西雲南均百日山東至順天直隸
山西河南江蘇安徽均限三十日浙江湖北均
五十日奉天江西陝西均六十日福建湖南均
七十日甘肅七十五日四川廣東貴州均八十
日廣西九十日雲南百二十日山西至順天直
隸山東河南陝西均限三十日甘肅四十日奉
天湖北均五十日江蘇安徽江西湖南均六十
日浙江四川均七十日福建八十日貴州九十

日廣東廣西雲南均百日河南至順天直隸山
東山西江蘇安徽陝西均限三十日湖北四十
日江西甘肅均五十日奉天浙江湖南均六十
日貴州七十日福建四川均八十日廣東廣西
雲南均九十日江蘇至安徽限二十日山東河
南江西浙江湖北均三十日順天直隸湖南均
五十日山西福建陝西四川貴州均六十日奉
天甘肅廣東廣西均八十日雲南九十日安徽

至江蘇限二十日山東河南江西浙江湖北均
三十日直隸湖南均五十日順天五十五日山
西陝西福建四川均六十日貴州七十日奉天
甘肅廣東廣西均八十日雲南九十日江西至
江蘇安徽福建浙江湖北湖南均限三十日廣
東四十日河南五十日順天山東山西四川貴
州均六十日直隸廣西均七十日奉天八十日
陝西雲南均九十日甘肅百日福建至江西浙

江均限三十日江蘇安徽湖北廣東均六十日
山東湖南均七十日順天直隸山西河南廣西
均八十日奉天四川貴州均百日陝西甘肅雲
南均百二十日浙江至江蘇安徽江西福建均
限三十日山東湖北均五十日順天直隸河南
湖南廣東均六十日山西七十日奉天八十日
陝西四川廣西均九十日甘肅貴州均百日雲
南百二十日湖北至江蘇安徽江西湖南均限

三十日河南四川貴州均四十日順天直隸山東山西浙江陝西均五十日福建廣東廣西均六十日奉天甘肅雲南均七十日湖南至江西湖北四川貴州均限三十日江蘇安徽甘肅廣西均五十日山西河南浙江陝西廣東雲南均六十日順天直隸山東福建均七十日奉天九十日陝西至甘肅限二十日山西河南均三十日湖北四川均五十日順天奉天直隸山東江

蘇安徽湖南貴州均六十日江西浙江雲南均
九十日福建廣東廣西均百二十日甘肅至陝
西限二十日山西四十日河南湖南均五十日
四川六十日順天直隸湖北貴州均七十日山
東七十五日奉天江蘇安徽均八十日江西浙
江雲南均百日福建廣東廣西均百二十日四
川至湖南貴州均限三十日湖北四十日陝西
雲南均五十日江蘇安徽江西甘肅廣西均六

十日山西廣東均七十日順天直隸山東河南
均八十日浙江九十日奉天福建均百日廣東
至廣西限三十日江西四十日福建浙江湖北
湖南貴州均六十日四川七十日山東江蘇安
徽均八十日順天直隸河南雲南均九十日山
西百日奉天百有十日陝西甘肅均百二十日
廣西至廣東限三十日湖南五十日湖北四川
貴州均六十日江西七十日江蘇安徽福建雲

南均八十日順天山東河南浙江均九十日直
隸山西均百日奉天百有十日陝西甘肅均百
二十日雲南至貴州限三十日四川五十日湖
南六十日湖北七十日廣西八十日河南江蘇
安徽江西陝西廣東均九十日直隸山西甘肅
均百日順天百有十日奉天山東福建浙江均
百二十日貴州至湖南四川雲南均限三十日
湖北四十日河南江蘇江西陝西廣東廣西均

六十日安徽甘肅均七十日直隸山東均八十
日山西九十日順天福建浙江均百日奉天百
二十日吏科皆依定限填憑發給。乾隆十六
年題準官員領憑赴任各省各府均按遠近定
有限期至陸續增改新設之府並直隸州從前
未經議及只照省城填限限期迫切易罹叅處
應將增改新設各府直隸州詳細確覈別行定
限湖南省永順府限八十日沅州府桂陽府郴

州均限八十五日澧州限六十五日靖州限九十日廣西省鎮安府限一百三十日鬱林州限百二十五日山東省泰安府武定府均限三十日曹州府限三十五日沂州府限四十日四川省潼川府綿州均限八十日嘉定府資州均限九十日眉州邛州茂州均限八十五日忠州達州均限一百十有五日子州限九十五日酉陽州限一百二十五日陝西省同州府商州鄜州

均限五十日榆林府綏德州均限四十日興安
州限六十五日邠州乾州均限五十五日。十
七年題準雲南省昭通府限百有十日普洱府
限百二十日湖北省宜昌府限七十日施南府
限八十五日甘肅省蘭州府階州均限五十五
日秦州限五十日肅州限八十五日河南省陳
州府許州汝州均限三十五日陝州光州均限
四十五日。又題準貴州省大定府限百有十

日安徽省潁州府限四十五日泗州限五十日
滁州六安州和州均限五十五日廣德州限六
十五日山西省遼州沁州忻州保德州平定州
代州均限三十日解州絳州吉州均限四十日
隰州限三十五日。十八年題準江蘇省徐州
府海州均限四十日通州限五十日太倉州限
五十五日福建省永春州限九十日龍巖州限
百日廣東省嘉應州連州均限百有十日羅定

州限百有五日

一給憑赴任限期康熙四十九年議準自京赴任官員及在外推升官員由原任地方赴新任均照各省遠近定有程限違限者照赴任違限例處分其在京補授官員自奉

旨之日起限十日內給憑給憑後亦限十日繫旗員交與該旗繫民人交與都察院轉行五城該兵馬司指揮嚴催照限令其赴任在外推升知縣

以上官員亦自奉

旨之日起限十日將文憑即行發與各該巡撫伊等
向有兩月交代之限應俟交代完全領憑之日
起亦限十日該督撫嚴催照限令其赴任令該
管官將起程日期報部存案如不於十日內將
文憑給發者照

欽件違限例處分如不速催赴任者將督催之員罰
俸六月

一畫憑違限康熙九年議準各官赴吏科畫憑
無故遲至一月以上者罰俸一年兩月以上者
照規避例革職遇

赦免議

一赴任違限順治四年覆準各官領憑赴任違
限一月以上者罰俸三月兩月以上者罰俸六
月三月以上者降一級調用四月以上降二級
調用五月以上降三級調用半年以上革職不

及一月者免議如中塗患病及風水阻滯等情
取有地方官印結咨報部科免議倘實無事故
遲延不赴新任并繞道歸里捏稱中塗患病者
均照文憑違限例計月處分出結官罰俸一年
轉詳出咨各官罰俸六月○康熙三十八年覆
準凡外官升授京職如原任內實有不得已之
事該督撫察明具題如中塗患病阻滯本官具
呈地方官驗實出結申報該督撫詳覈題明皆

免議倘實無事故借端觀望遲延及繞道歸里
捏稱中塗患病者將本官及出結轉詳代題各
官皆照文憑違限例分別處分。雍正十三年
議準赴任官員如遇中塗事故阻滯違限一二
月不及取具地方官印結者該員呈明督撫察
繫確實移咨部科免其叅處若違限至三月以
上有地方官印結者免議如無印結仍照例察
叅議處。乾隆十五年議準外省推升各官事

竣之日即行給咨赴部如有因闕之美惡故為規避者即照規避例革職倘督撫將規避情由代為徇隱亦照徇庇例降三級調用如該員任內承辦事件能否於半年內完結之處該督撫不於兩月限內覈實咨部者照

欽部案件違限例分別議處

一赴部投文限期康熙十五年議準候補候選等官起文赴部在京者限十五日直隸限兩月

山東河南山西限三月江南江西浙江陝西湖
廣限四月福建四川兩廣貴州限五月雲南限
六月均令照此限內到部投文若有違限者皆
照赴任違限例處分。乾隆十四年奏準候補
候選各官與已經得闕者不同況領咨之後或
因資斧艱難或因選期尚遠以及患病阻滯等
情若緊照赴任違限例議處殊覺過重嗣後投
文違限取有事故印結送部者免議若無前項

情節無故遲延違限至半年以上者得官日罰俸六月一年以上者罰俸一年如司官不行詳察致有錯誤亦照例議處

一教職文憑康熙五十六年議準直省教職文憑以到布政使司之日計算限一月給發該員將給發日期報部如布政使司違例照

欽部事件違限例處分其教職領憑之後以布政使司發憑之日起限一月內赴任違者一例察叅

照文憑違限例處分

一臺灣瓊州給憑限期康熙四十三年議準福建臺灣廣東瓊州遠隔海洋升員領憑於交代兩月定限外再展限兩月教職領憑於一月正限外再展限一月起解各項人犯於兩月正限外再展限兩月命案於六月正限外再展限兩月官員歸旗仍限三月內回旗毋庸展限

一巡撫濫行給憑康熙四十三年議準月選郎

中以下知縣以上官員並在京升用在外見任
推升道府運同同知州縣各官仍照例引

見外其見任論俸推升例不引

見官員吏部具題奉

旨後將憑封發該撫詳加驗看如果居官好有才能
者即行給憑令其速赴新任有年老不及者即
行具題由部別行銓選如將年老不及者給憑
令赴新任不能供職發覺之日將給憑之巡撫

照保薦不實例降二級調用

一繳照逾限雍正五年題準各省調來引

見回任各官由部照憑限日期給與執照該員到日
令督撫察明回任日期咨報並原領執照繳部
有回任違限者該督撫照赴任違限例題叅逾
限十日以外即照違限一月例議處如有患病
等情照官員領憑赴任中途患病例察覈。乾
隆五年議準凡奉

旨命往各省人員由部給照前往其繳照違限如中
塗果有患病及風水阻滯等情皆照領憑赴任
中塗患病例察叅其有並無事故逾限察叅到
部者照赴任違限例分別議處具題仍將違限
不及三月應否照領憑赴任違限不及三月寬
免之處於本內聲明請

旨。十八年議準嗣後繳憑違限官員均由吏科於
每年六月底年終彙題交部察議其繳照違限

官員亦毋庸逐案具題以滋瑣屑應照吏科之例亦於每年六月底年終彙題完結

一外官攜帶家口康熙二十五年議準外任官員除攜帶兄弟妻子外漢督撫準帶家人五十名藩臬準帶家人四十名道府準帶三十名同知通判州縣準帶二十名州同縣丞以下官員準帶十名其所帶婦女亦不得過此數漢督撫有管兵之責如有多帶者令其自行陳請至旗

員有邊疆差遣之事非民官可比督撫所帶家口不許過五百名司道以下等官所帶家口照漢官加一倍如違定數多帶者降一級調用
一旗員子弟隨任雍正五年遵

旨議定外任大小旗員帶族人赴任所者永行禁止若
繫適親子弟十八歲以上亦不得帶赴任所倘
私自帶往及隱瞞歲數不令回旗者察出將該
員解任親送子弟來京仍交部照外官違數多

帶家口例降一級調用失察之該旗都統照不行詳察例罰俸六月

一外任旗員家人冊報督撫雍正五年議準外任旗員到任後限三月內將所帶家人姓名年貌冊報督撫如管事家人有更換者亦冊報督撫倘本官有虧空者該督撫將管事家人一并審訊若有歸旗追比不能完結者著將管事家人照拖欠錢糧家產全無之子孫治罪例治罪

若本官冊報不實任其飽颺贖身及隱射為民者皆照隱匿逃人例治罪家人照三次逃人例發遣其不行詳察各官皆照失察逃人例處分得財者並計贓以枉法從重論

一州縣收用長隨乾隆元年議準嗣後州縣收用長隨比照旗員家人之例於到任後限三月之內將長隨姓名籍貫年貌並令管何項執事一一開明造具印結分報該管上司存案或有

辭退回籍及驅逐者亦即開具事由申報上司
察覈倘本官以劣蹟贓款被叅即將長隨一并
看守審明完結至見在州縣之長隨亦令一并
據實開報以便稽覈如該州縣官將所用長隨
冊報不實經上司察出指叅即將該州縣官照
遺漏造冊例罰俸三月倘該管各上司未經察
出據冊轉報者罰俸一月。十四年議準各省
督撫務令將州縣長隨按季察覈出具並無冊

報不實印結申送督撫衙門存案如督撫以及
上司不實力稽察別經發覺將該管上司照失
於覺察例議處督撫照不行詳察例議處

一奉差不復任康熙十五年議準凡奉差事竣
復任遲延者照赴任違限例處分

一迎接新官乾隆二年議準新官到任令舊官
於書役內量撥數人止準在交界處所等候呈
送須知冊籍其餘書役槩令隨印交代不許約

結多人執批遠迎並將頭接二接三接陋習嚴
行禁止如舊任官一任書役多人中塗遠接將
舊任官照不行管教例罰俸六月新任官令其
遠迎將新任官照上司令屬員出界遠迎例罰
俸一年

離任

一官員交代康熙十五年議準凡各省督撫於
州縣官離任交代時先將接任正署各官到任

日期咨報戶部限兩月交代若本官將錢糧等項事件不候交代明白即行離任者將本官降二級調用督撫罰俸一年至各項錢糧冊籍等項未完詐稱完結或假捏印結申詳或增改投遞者革職如本官將冊籍等件未交代以前被衙役燒燬擲水藏匿等情降一級調用至衙役乘機作弊侵匿庫銀者照失察衙役侵盜錢糧例處分其鹽課錢糧未經交代清楚離任之官

巡鹽御史運使等官皆照此例處分。雍正五

年遵

旨議準凡官員交代按限清楚者該督撫咨戶部如有
遲延該管上司揭報該督撫將遲延緣由察明
開注如繫舊任官不於定限內將錢糧等項清
白造冊交送者將舊任官罰俸一年新任官免
議如舊任官遲至例限將屆始將冊籍造送新
任官又不上緊察覈以致遲延將舊任官罰俸

一年新任官罰俸六月如舊任官已將錢糧等項清白造冊交送而新任官推諉不接以致遲延將新任官罰俸一年舊任官免議督催不力之上司罰俸六月倘限滿不行察叅即繫該督撫及各該管上司徇庇應聽戶部扣限題叅照徇庇例議處如無未清錢糧等項事件上司藉端抑勒遲延者將抑勒之司道府等官各降二級調用督撫降一級畱任其署任官新任官如

有抑勒亦照此例處分。又議準州縣倉糧多至五萬石以上者於交代定限兩月之外展限一月。六年奉

旨錢糧交代五萬兩以上者亦令展限一月十萬兩以上者展限兩月十五萬兩以上者展限三月著為定例。又議準倉穀五萬石以上者展限一月其二萬五千石以上者準展限十五日至或一人而有兩處交代者準展限一月。乾隆元年覆準直

省各府州縣委署之官一經到任即令舊任之
員將任內一切正雜錢糧等項造冊交代署任
官依限交盤如實有虧空難於接受即行揭報
如易於交盤而署任官故意延挨希圖卸責以

致遲延者將署任官降二級調用

按此條原奏因署任官每

於交代時故意延挨不即盤收展轉之間新任官已到復從新任官到任之日起限而署任官全局脫卸則是有意遲延與實在難於交盤而遲延者有間同一議處未為妥協是以處分從嚴謹將例意注明以免與前條新任官推諉不接以致遲延一條牽濶
如該監盤

上司徇隱不舉降一級調用。九年覆準官員奉調入闈者必須局瑣在闈所有交代項下有無虧闕無由而知應將奉調入闈公出日期準其扣除展限。十四年覆準司道府存倉米穀亦照州縣例二萬五千石以上者展限十五日五萬石以上者展限一月

一升補離任康熙十五年議準升任官不候文憑即行離任將本官降二級調用至官員遇應

離任時該上司不即委官署理者罰俸六月

一交代限外出結雍正八年覆準府州縣交代
錢糧各照定限如已授受清楚申送冊結務於
文內注明到任與出結各日期其中送到府州
即按程塗冊內日期計算至該管府州加結文
內亦即注明到省程塗日期如到任在限外出
結亦在限外即行揭叅若州縣相隔遙遠冊結
雖到在限外而出結實在限內免其叅處仍將

出結日期報部察覈再有兩月定限已逾按其
程塗日期計算已屆仍無冊結繳司該撫即行
指叅倘該州縣捏報出結日期及該管之府州
通同徇隱等弊令各該撫據實報叅

一交代遲延康熙三十八年議準官員交代不
於兩月內察明呈報上司者仍照定例遵行外
至兩月之外如再遲延該督撫務將遲延之故
確覈題叅如止以遲延題叅而不察明因何遲

延之故者將申詳之司道府等官皆照徇庇例
降三級調用督撫照含糊具題例降一級畱任
一遲延二叅雍正六年議準官員盤察交代正
限內不能完結該督撫劾叅到日照例議處再
限兩月完結如逾限不結照易結不結例革職
一知府交代乾隆六年覆準凡知府到任無論
正署悉照州縣之例咨部扣限兩月交代令該
管道員按限督催接任之人盤量清楚即照例

取造冊結咨部察覈如有逾限交代不清立即
分別叅處

一直隸河官交代雍正十三年議準直隸河工
錢糧及存貯物料堆積土牛等項事宜令廳汛
各官毋論實授署事遇有升遷事故均照州縣
倉庫錢糧之例定限兩月造具交代清冊移送
新任官察覈新任官逐一覈明出具交代清楚
印結呈送該管上司考覈咨部如舊任官將錢

糧物料工程等項不交代明白或新任官扶同徇隱及抑勒遲延並該管上司督催不力以致違限等情該督照例題叅議處所蓋堡房責令該管汛官隨時察驗稍有破壞即行修葺完固交代之時飭令接任官造冊送部倘有破壞接任官即行揭報請叅責令賠修驗明完固題請開復如該管廳官不加督察或扶同徇隱或損壞堡房不令該管汛官隨時修葺一經揭報照

礮臺邊界烽墩等項不催之上司例叅處至承
修工程如保固限期未滿而該員遇有升調緣
事離任者不在交代之例照例著令承修之官
保固期滿毋致疎虞

一教官交代乾隆六年議準各學正副教官離
任時均照州縣之例將從前奉到

頒發存貯書籍器物並一切經手學田租穀之項造
冊出結交與接任之人覈明接受造冊出結由

該府州縣察明加結詳司轉送督撫學臣各衙門存案仍將交明緣由報部倘離任之官有心隱匿者察明題叅闕失者責令賠補若接任之官不行察明濫出冊結接受即著接受之官暨加結之府州縣賠補府學教授責成知府加結分賠州縣教官交代既有州縣督催毋庸再令知府加結如逾限交代不清亦照州縣之例咨叅議處。又議準凡新任及別學接署者均令

交代出結若教授學正教諭離任而本學訓導署理及訓導離任而本學教授學正教諭兼攝者該員原繫經管之人毋庸送冊具結。十四年議準教職交代不過書籍祭器學田等項非州縣官可比所有兩月限期酌減一月限一月完結

一倉廩交盤雍正五年

諭直隸各省倉穀若有前任官折價存庫者不許新任

官接受交代仍令前任官買穀交倉不許顆粒短少
其該管督撫上司亦不得徇情寬縱倘有故違定將
本官及該管官分別從重治罪永著為例欽此。六
年遵

旨議準凡州縣不將倉廩黏補修理以致米穀霉爛者
照溺職例革職並令先動帑銀將霉爛米穀照
數買補實貯仍勒限一年內照動帑買補銀數
賠完如限內不完依律治罪再各府州縣倉廩

均造入交盤項內新舊交代若有木植燬爛牆垣傾圯滲漏者著接任官即行揭報不準接受將前任官照原議例議處賠補如接任官有徇情濫受者即繫接任官之責亦照例議處仍令賠修其霉爛虧空米穀即著落接任官限年賠完如限內不完亦照例治罪再新舊交代或有故為抑勒及交代遲延借辭飾報者令該督撫據實指名題叅。乾隆四年覆準陝省州縣交

代之時令於限內將正項錢糧交代清楚再展限一月將社倉米穀稽覈交代如有虧空據實詳揭報部審追如無虧空結報上司存案

一自理案件及奉行條例造入交盤雍正十三年覆準各省州縣交代時將任內自行審理戶婚田土錢債等項案件黏連卷宗鈐蓋印信造入交盤冊內仍彙錄印簿摘取事由照依年月編號登記注明經承姓名隨同卷宗交代並將

累任遞交之案一并檢齊加具並無藏匿抽改
甘結交代接任之員交代完日照例報明上司
察覈倘有不肖胥吏違玩不行察明交代並有
乘機隱匿增改作弊等情將失察之該管官照
失於詳察例罰俸一年。乾隆九年議準凡有
關定例之部文該督撫接到三日一槩通行藩
臬衙門到司之後專管該司於行府之外分移
各道到府之後於行州縣之外並分移丞倅等

官則大小臣工嫻習律例並令大小衙門將奉行條例委撥專書彙總齊全入於新舊交盤之內倘有疎忽將該管官照遺漏行文例察議其該管典吏照遺失官文書律治罪

一徇隱虧空康熙十五年議準司道府州縣新舊官交代之時如前官任內有侵欺透冒那移墊解並拖欠未清等弊署官新官徇隱不行揭報交代後始行察出者該督撫覈實題叅將虧

空之官照例革職治罪接任官照徇隱虧空例
革職欠項照例賠補如有侵那拖欠等弊接任
官不受交代通詳督撫司道府而上司不行詳
報題叅徇庇舊官逼勒新官交代者新任官即
行據實報部將逼勒之上司以徇庇例議處本
官於別省員闕調補。雍正四年遵

旨議準州縣交代除實在民欠外其有將已徵之錢糧
侵蝕虧空捏稱民欠令接任官接受者接任官

即行揭報督撫司道該督撫即行題叅或該督撫護庇離任之人該管知府知州畏慮分賠因而抑勒交盤者被勒之人直揭部科部科代為陳奏所揭司道府州等官行令各該督撫據實確審定擬具奏其干連督撫者將具揭之人與前任虧空之人皆押來京交都察院審明將抑勒之該督撫以徇庇例議處或繫誣捏枉揭將誣捏枉揭之人交與刑部加倍治罪倘前官虧

空後官贍徇容隱不報出結接受者將欠項坐
後官賠補及已經接受本身離任之時有虧空
未清始稱繫前任虧空者將欠項追賠外仍照
徇隱虧空例革職其出結之人後經調任他省
該管上司有因該員從前揭報之故多方搜求
借端誣陷者許該員於都察院呈辨果繫叅處
冤抑將該上司照屈廉為貪例議處如該員本
有應得之罪藉從前揭報之名誣行呈辨者友

刑部治罪

一三品以上官員離任雍正五年

諭三品以上京官升轉之日其原任內若無同堂辦事之人仍令本人辦理竣吏部具本開闕奉旨補用人員之後方行卸事其兼管別衙門者亦一例遵行欽此

一離任康熙十四年議準凡解任督撫部文到日令其離任巡撫事務令總督署理總督事務

令巡撫署理如無總督之省及總督兼管之省
巡撫解任將

勅書印篆交與布政使護理。二十五年議準凡官
員不許將離任督撫具題保留若有違例題請
者降一級畱任。乾隆五年覆準各省督撫以
屬官才具不勝繁劇題請調簡不必等候部覆
於拜疏日即令離任員闕別委署理倘該員任
內有承追督催經徵展叅等案由部別行議駁

並令該督撫立即題叅分別議處其朦濶具題之上司亦一并察議至調繁之員統部覆議準方離原任。十五年

諭各督撫於屬官有題請革職休致別行降補改用教職以及丁憂告病之類應離任者皆一面具題一面即行委官收取印結署事並將任內經手錢糧一一清察毋得瞻徇著為令欽此

一裁汰康熙九年議準裁汰官員別無事故久

總者降一級調用容畱之該管官罰俸一年督撫罰俸六月。十八年議準督撫題請裁汰冗員不候

旨即裁者罰俸一年

一外官卸事交盤限內出署乾隆元年覆準外省官員卸任之後務於交盤限內即行出署別居不得久占衙舍如不依限出署接任官即詳明上司稽察將舊官降一級調用接任官聽其

久住不行詳報者罰俸一年

欽定大清會典則例卷十三

欽定四庫全書

欽定大清會典則例卷十四

吏部

考功清吏司

給假

一京官給假順治初年定在京大小官員告假
祭祖父者食俸十年以上省親者食俸六年以
上遷葬者食俸五年以上親老送回原籍者不

論食俸○康熙十年題準各官給假取本衙門
堂官咨文並同鄉京官印結到部由部具題得
旨方準給假至俸深於應升月分不準告假其定限
直隸各省均一例許住家四月往返路程直隸
限四月山東山西河南限六月江南江西浙江
湖廣陝西限八月福建四川廣東廣西貴州限
十月雲南限一年其衙門咨請暫假員闕不補
者不準至假滿時人文到部令其候補○乾隆

五年奏準在京官員有聞其父母患病急欲省覲或父母年逾七十而衰憊者均不俟六年俸滿亦不得定以限期著取同鄉京官印結具呈本衙門該堂官具奏請

旨給假回籍該堂官具奏之後即行知照本部開闕不必彙題如有只請暫假數月假滿回任並不聲明例應開闕含糊陳奏者該知照到部後除仍行開闕外並將具奏之該堂官交部議處其

食俸六年告假省親仍照舊例行

一道府告假乾隆十六年

諭道府等官於請訓赴任時有面奏暫假回籍經允
準者皆於次日具呈吏部覆奏此雖向例而人容
有不知者文員告假有何關係此不過陞見之時
以為奏對塞責耳嗣後各省道府等官皆不得於
請訓時自行乞假皆令赴部呈明其應否準行即
由該部酌定給以假期仍按月彙奏以昭畫一欽

此遵

上旨議定道府等官告假回籍者有省親及祭掃祖墓之分應除去往返程塗計算如呈請省親祭掃者準其告假二十日修墓及遷葬者準其告假一月總不得逾一月之限

一教職告假乾隆五年議準各省教職食俸三年以上如有父母在家不能迎養欲回籍省親及葬親省墓等事準其咨明州縣官轉詳該管

上司察明委繫實情取具該州縣印結計其程塗遠近酌給假期報明存案員闕毋容開選不得一學兩官同時告假亦不得告假之後復行請假如一學只設一官者亦準一例給假令該州縣暫攝學篆其準假之員該上司勒限回任倘逾限不到該督撫照例咨叅○十二年議準嗣後教職告假期內聽其食俸其假期屆滿果繫一時抱病令原籍地方官驗明結報許其展

限一月病痊回任如一月限滿該員病體難以驟痊令原籍地方官照告病例驗明出結通詳咨部別選如有捏飾徇延等弊將該員並地方官照例分別叅處再定例內外官員皆按到任日期較俸升轉如有離任事故按日扣除嗣後遇有教官告假該督撫酌定假期務將起程回任日期分晰報部注冊升轉時亦照離任事故之例按日扣除又定例調任官員如有未報到

任者雖值論俸應升之時不準升轉今教官既定有告假扣除日期之例嗣後如遇論俸應升之時該員正在告假限內亦應停其升轉俟假滿回任咨報到部之日再行升用

一候補候選人員告假康熙十年議準內外大小候補官員如有情願回籍者具呈準其回籍竝來京之日仍照原文補授大選官員亦準給假選授之時仍照原序○又議準凡考取內閣

中書有具呈給假回籍者亦準給假來時仍照
考取注冊名次挨補

一京官告病康熙九年議準在京漢官告病給
假者準回籍調理停其勒限年分竝病痊之日
該督撫咨部注冊赴部補用如大學士尚書左
都御史侍郎學士左副都御史告病告假自行
具奏其餘各官具呈該部院衙門取具同鄉京
官並無假捏印結該部院移部彙題準其回籍

調理如身無疾病具呈者將本官降一級調用
驗看出結官各罰俸一年堂官罰俸六月其告
病回籍官在地方生事營私發覺將本官革職
所屬地方官不報督撫者降二級調用該地方
官既報督撫督撫不行具題者將督撫降一級
留任其丁憂告假回籍官員在地方生事發覺
亦照此例○二十六年題準在京各部院衙門
滿漢官員告病之後若病痊竢一年限滿方準

起病補用如有不及年限咨部者槩不準行○
雍正十二年定凡告病告假丁憂等事皆半月
彙題一次值初一十五日不奏○乾隆四年奏
準文職旗員無論見任及指闕推升擬補或未
經引

見與已經引

見尚未到任之員如實繫患病均令該管官委官確
實察明並無捏飾酌量給以假期咨部存案準

其在家調理總不得過六月之限如逾限不痊即行開闕別補俟病痊之日仍以原衙門補用其額外食俸官員如遇患病亦照此例定限如逾限不痊即行停俸俟病痊之日仍在原衙門行走如無疾捏稱有疾呈報者別經發覺照漢官之例將本官降一級調用驗看官罰俸一年出咨之該管官罰俸六月

一外官告病康熙九年議準總督患病巡撫驗

明具題巡撫患病總督驗明具題如無總督之
省巡撫自行具奏○又議準告病官員託故詐
病者發覺之日令本官赴部驗看如無疾病將
本官革職驗看官保結官各降一級調用代題
督撫罰俸一年○雍正五年

諭外官告病督撫察明確實具題令其回籍調治痊可
有情願起用者於本籍起文赴部引見仍以原官補
用欽此○六年

諭督撫大吏以事繁任重無人可代力疾辦理竟致不起皆因勉強視事未得調攝雖生死有一定之數然朕軫念大臣勤公事而廢頤養實愀然不忍於懷也嗣後督撫等倘有一時患病難以辦事者不可勉強支持即著一面奏聞一面將印務酌量委人署理俾得安靜調攝則所患自然易於痊可足以慰朕體卹臣工之至意若兩司中有似此者著該督撫仰體朕心亦酌量委人代辦具摺奏聞欽此○十三年議準

布政使以下等官告病該督撫委官驗看確實具題令該員解任留於本省調理病痊之日該督撫給文赴部仍以原官補用○乾隆四年奏準見任州同以下告病等官除平常稱職居官無實績可據者令其休致外其有居官勤慎辦事優長實繫出衆之才於告病時不論食俸年限許該管官開列事實加具印結詳報督撫詳加察覈委無捏結情弊將該員居官辦事才能

出衆之處出具考語咨部注冊準其解任調理
病痊之日該督撫給咨赴部仍以原官補用至
微員告病例不具題皆由該管官具結申詳司
道府固無驗看之責督撫止據結報部嗣後佐
雜等官告病如有扶同假捏等弊本官草職驗
看官出結官降一級調用督撫司道府等官免
其議處○又奏準凡甫經授職尚未到任道府
州縣以及佐雜等官如有中途患病不能赴任

者即報明該地方官驗看出結報部準其回籍
調理俟病痊之日原籍督撫給咨應引

見者令其赴部引

見例不具題者咨部注冊均以原官補用至試用之
員告病經該督撫題咨病痊起用者亦照見任
之例有任者在省調理無任者回籍調理俟病
痊之日如州縣以上等官該督撫給咨赴部引
見其州同以下等官該督撫給咨該員赴部由部給

咨該員赴原試用地方試用○八年奉

旨外省官員告病者準督撫題請解任留於該省調理病痊復用者乃國家愛惜人才之意但該員既以患病解任又復留於該省調理未免食用艱難情亦可憫嗣後同知以下官員告病者皆準其回籍調理病痊照例銓補不必留於該省若道府等官該督撫具題請旨著為定例

歸籍

一歸旗定限康熙二十六年奉

旨歸旗人員皆令該督撫嚴行催促限五月內回旗○
人議準草職解任官員歸旗若不撥兵護送取
具沿途官交送印結者罰俸九月○二十九年
題準凡應歸旗人員無故不速起程逾限一月
以上或已起程中途逗遛或不進京在他處居
住或本身已來而家口在他處居住有官者草
職已革職者交該衙門治罪其該管州縣官同

城知府不速催起程容留一人者降一級留任
二人者降一級三人者降二級四人者降三級
五人者降四級皆調用六人以上者革職道員
及不同城知府所屬地方容留一二人者罰俸
一年三四人者降一級留任五人以上者降一
級十人以上者降二級皆調用督撫所屬地方
容留一二人者罰俸三月四人者罰俸六月五
人以上者罰俸一年十人以上降一級留任倘

歸旗人員已經起程該地方官不將起程日期申報或已申報而督撫不行咨明該部該旗以致逗遛生事者亦照此例議處如歸旗人員於原任地方起程逾限不及一月或實因患病及有不得已情由難以起程或已起程中塗患病難行阻滯情實者取具該地方正印官印結報部槩行免議如並無事故妄藉事端謊取印結其地方官不將此等情由申報濫給印結一經

發覺將謊取印結之員仍照逗遛逾限例處分
出結之地方官照容留例處分○又議準草職
降級旗員家口住居原任地方有錢糧未清勒
限兩月之外再限六月完結如限滿不完該督
撫將承追督催各官題叅照例議處一面即將
拖欠錢糧之官並家口一并催令歸旗將未完
錢糧詳細總數備造清冊咨送該部轉交該旗
都統變產賠補逾此定限不令起程歸旗亦照

容留廢官例處分至原叅督催承催官員降俸
戴罪督催之案該旗將此項拖欠之錢糧催完
該部察明具題咨部察銷○雍正三年議準歸
旗人員大路有驛站者每日行一站僻路無驛
站者每日行五十里自本任地方照站數里數
計算扣定到京日期咨報該部該旗察覈○四
年議準凡應回旗人員除原無水路地方及能
自備脚力並願從陸路回旗者任由陸路外其

有水路之處應聽由水路行即於呈內開明由某省水路照原定限期計算到京倘無故逗遛致違定限照原例議處治罪其起程時原地方官不報明督撫及督撫不行咨報該部該旗並沿途地方官不挨程催趲者仍照容留旗員例分別議處○又議準八旗外任官員凡有降級革職及升轉休致應歸旗者一經離任該督撫即令接任官將該員所有家口逐一詳察共有

若干名數備造清冊一面依限催令起程一面
出具並無遺漏隱匿印結同冊一并咨送該部
該旗以便察覈倘接任官將前任旗員家口聽
其隱匿不盡行造入冊內或被旁人首告或被
該部該旗察出將接任之官及不行察叅之各
上司并督撫皆照容留旗員例分別議處至沿
塗地方官遇有歸旗家口經過務行逐一詳察
遞送勿使潛匿在境如有瞻徇遺漏事發將沿

塗地方官亦照容留旗員例分別議處如歸旗人員不候造冊給咨及沿塗不站詳察家口撥兵護送竟行越度者許該地方官即行詳報該督撫指名題叅照起程逾限中塗逗遛例治罪如聞訃奔喪不候咨文先起行歸旗中塗並無逗遛者照違令私罪例於補官日罰俸一年○乾隆四年奏準外任旗員隨任子弟如該員緣事解任應留任所隨任子弟有應行質問事件

由接任官申報上司咨明該部該旗仍留任所
候質如無候質事件應先行歸旗之隨任子弟
倘地方官不請給咨私令回旗者降一級留任
隨任子弟不候給咨私離任所該地方官未經
察出申報者罰俸九月其擅自潛往之子弟有
職者革去職銜閒散人照例鞭責○又奏準各
省駐防旗人來京者令各該將軍等察明本人
三代造冊出結先行知照在京該旗仍出具印

文交與本人親身投遞該旗以憑察對至外任
文武旗員隨任子弟來京者由任所該父兄造
具本人三代年貌清冊呈請該管將軍副都統
督撫提鎮府尹城守尉等官出咨知照在京該
旗仍給文本本人親齎投送該旗如任所父兄繫
文武大員可以自行出咨者其隨任子弟有事
來京即由該父兄自行給咨其有不領咨來京
及領咨潛往他處有職者革去職銜閒散人鞭

一百如隨任子弟之父兄不為請咨給咨擅令
來京者罰俸一年如已經呈明而該將軍副都
統督撫提鎮府尹城守尉等官不給咨文者罰
俸九月至旗人有事來京仍回原處者呈明在
京該旗亦照該地方給咨之例出咨知照該地
方仍給文本人親投該管駐防或任所上司衙
門以憑察覈其有不領咨私回或領咨潛往他
處及已呈明該旗官員不給咨文者皆照例議

處○十五年議準歸旗人員限三月催令起程如有實在不能起程緣由詳報展限

一旗員子弟隨任雍正三年遵

旨議準外任旗員子弟至十八歲以上者不令帶赴任所其未至十八歲者具呈該都統存案至十八歲悉令歸旗○乾隆三年議準旗員適親子弟舊繫同居實有不能相離之勢督撫具題到日由部察明不能相離情由具奏請

旨如有並非適親子弟或舊非同居並見在該旗當
差及已經歸旗之後復請往任協助者緊不準
行○五年奏準外任旗員將任內所生之子隱
漏不報本旗注冊或假捏過繼潛匿他處除將
令其隱匿及潛留外省之員斥革治罪外該地
方官在任半年以上不行察出或被旁人告發
或別經發覺將失察之該地方官罰俸一年該
管之道府罰俸六月如居住失察未及半年及

雖過半年自行究出者免議如該地方官明知旗人隱匿之子容隱不行察報者降一級留任該管道府罰俸一年○七年議準旗員子弟至十八歲以上者悉令歸旗其實有不能相離之情方準奏請隨任道府等官督撫代奏今欽奉諭旨在外令該督撫題請在內呈明該都統察奏是外任旗員子弟無論在內在外均準一例隨任若必逐案題奏未免紛繁嗣後外任子弟請留

任所者該督撫覈實情節先行咨明部旗存案
仍俟年終由部彙齊人數具題其在旗各員初
蒞外任呈請帶往任所者仍遵

旨呈明該都統察奏

一漢官回籍定限康熙二十九年議準漢官草
職離任者亦照旗員之例勒限回籍將起程日
期報部○雍正三年遵

旨議準漢官草職提問應於原籍地方追賊治罪者在

內令司坊官在外令該督撫作速催令起程將起程日期報部並知會原籍地方官仍照旗員歸旗例按各省遠近程塗定限有驛站者每日行一站無驛站者每日行五十里除從陸路者任由陸路外其有由水路者亦聽其便並將由某省水路之處即於呈內開明自本任地方照水路程塗站數里數扣定到籍日期該督撫竝本人到籍將日期報部察覈其草職免罪之員

外官交代完日限三月內京官限一月內該地方官催令起程按照程塗定限回籍倘違限不即起程及逗遛中塗並回籍違限一月以上者都察院並該督撫題叅照處分旗員例交部分別治罪倘該管官不速催令起程或他省官員聽其逗遛境內皆照容留旗員例議處同城知府照州縣例議處不同城知府照道員例議處司坊官照地方官同城知府例議處巡城御史

照督撫例議處如實因患病及有不得已情由
難以起程或中塗患病難行阻滯情實者該地
方官出具印結申報督撫察明咨部免議若並
無患病並阻滯情事故違定限者本官與容留
之地方官皆照旗員例分別議處其解任休致
丁憂給假等官應聽其便○乾隆二年覆準草
職官員應於原籍地方追贓治罪者仍行給咨
押解外其草職免罪之人別無未清事件遵照

定限催令回籍免其請咨遞解

一容留提鎮等官任所入籍置產康熙五十一年議準見任提鎮以及副叅游都守並丁憂休致有事故解退之提鎮等官均不許在任所入籍置產令地方各官嚴察如有此等入籍置產者勒限六月逐回原籍若該地方官不行察明不逐回原籍將容留之地方官降一級調用該管道府上司等官罰俸一年督撫罰俸六月

一賞給微員路費回籍乾隆三年遵

旨議準各省文職縣丞主簿典史巡檢等微員倘有
離任身故實繫窮苦不能回籍者除叅革人員
有貪劣重款繫有罪之人不得濫行給與路費
外其餘雖經叅革而無劣蹟及丁憂解任告病
身故者該地方官各就本省情形按照該員家
口多寡程塗遠近於存公項內酌量賞給還鄉
路費其病故之員或有親僕扶柩歸里或無親

僕而有同鄉近土之人情願代送該督撫察明
照例給與勘合令其回籍如病故之員並無親
僕與代送之人該督撫仍照例給發勘合令地
方官選差的役二名務令送回原籍取其地方
官印結送部如地方官選差不的以致中途遲
延或不送至原籍及將病故不能歸葬之員隱
匿不報上司者該督撫題叅將該州縣官罰俸
一年如州縣已報上司不行申報者將不

報之上司罰俸一年州縣免議

曠職

一九卿會議不齊雍正七年議準凡九卿會議
除在

內廷行走及奏事並該班出差有別項事故不到
外其應齊集之九卿務如期齊集或有本衙門
辦理緊要事不能到班者將原由行文知會主
豪衙門令都察院委滿漢御史二人將有事不

到之九卿登記案卷以備日後考覈如無故不到者察出即行叅奏照推諉例罰俸一年

一推諉事件康熙九年議準官員承辦事件已經遲延因而推諉他人者除將推諉之官照遲延月日處分外因其推諉再罰俸一年若將應辦事件推諉他人者罰俸一年○十八年議準漢官在署不待事畢推諉滿官早歸遲進燕會嬉游或料理公務瞻徇遲延不行即結司官聽

堂官題叅堂官聽科道題叅皆草職○雍正元年覆準各部院事件到司如清字者譯漢字漢字者繙清字滿漢司官斟酌畫一即定清漢字
臺公同畫押回堂遇有事涉疑難遽難定臺滿漢司官或有意見不同各據所見回堂斟酌定議務期依限速結如有故意推諉及遲延者是滿是漢對質即明或繫通同遲延一經科道糾叅堂官察出將滿漢司官照例分別議處其各

部院衙門事件堂司皆立用印號簿以備稽察
○又議準官員將自己遲延事件推諉他人者
仍照定例處分其各部院司官內如有故為巧
詐徇私誤公者經該堂官察出叅奏將承辦之
員照規避例革職○又議準除尋常事件仍按
日辦理外其有緊要事件均嚴定條約勒限催
辦作速完結倘有任意推諉或稱無例可援或
稱無案可稽以致遲延者該堂官即行察叅送

部議處其承辦事件如別有徇情納賄者察出即行題叅交刑部治罪

一嚴禁燕游康熙二十一年議準在外官員居住各城有偷安不早出堂理事任意燕會嬉游事務叢積者題叅草職

一案件假手書吏雍正四年覆準司道知府等衙門一切案件如假手書吏致書作弊者照溺職例草職督撫不行題叅照不叅劣員例降

二級調用

一直月官公事錯誤乾隆五年奏準各部院衙門除內務府太醫院並無委官直月之例外各部院衙門有職掌相同者亦有彼此互異者倘該衙門向例不繫直月官掌管之事若有疎失仍專責該管之官倘向繫直月官之所掌管者如稽察上朝事件若有失誤照失誤朝賀例罰俸一月鈔錄

上諭並特交事件不校對明確致有舛錯者照本內
緊要字遺漏例罰俸三月如奉傳不即赴鈔或
鈔出不即交發以致遲延者照遲延例罰俸三
月如有遺失者照遺失官文書律降一級留任
呈送題奏本章奏事名籤

皇帝御門聽政及各衙門該班奏事名單致有污損
者照墨污本章例罰俸一月失誤者照表文遺
漏不奏例罰俸一年軍營奏書報匣掛號舛錯

遺漏及呈送遲延照表文舛錯遺漏例罰俸一
年交發報匣遲延錯誤者亦照此例罰俸一年
接受文移知會並應行文鈔寫傳報送交公務
辦理遲延違誤者照疎忽例罰俸三月登記遺
誤者照造冊舛錯例罰俸三月收受假印文冊
不行察出者照失於詳察例罰俸一年收掌印
信如有遺失者照遺失印信律議處失誤請領
鑰匙擅開印封者照擅開官封律罰俸一年遺

失鑰匙者照中樞政考遺失鎖鑰例罰俸一年
監看印信如有詐為文書盜用印信失於詳察
已行者應照失察假官例降一級調用失察盜
用印信尚未施行別經發覺者照豫給用印白
結例罰俸一年漏用印信及全不用印者皆照
漏使印信律議處庫門啟閉不親身會同察驗
封鎖者照不應輕律罰俸六月不實力稽察官
兵皂役以致間人擅入

龍亭並竊失文書冊籍存公銀者照防範不嚴例

罰俸一年如繫庫貯金銀

冊寶祭器被竊照遺失

制書律議處曠班員役失於察出申報者照疎忽例

罰俸三月署中失火照地方官失火延燒文卷

例罰俸一年失察賭博照失察衙門書吏犯賭

例罰俸三月閒人擅入並牲畜損壞官署及不

能察禁酗酒鬪毆者照看守疎忽例罰俸三月

官員在署酗酒賭博不行申明回堂者照應申
上而不申上律罰俸六月再各部院衙門司官
筆帖式均繫輪流直月如互相推諉以致曠班
者將未經轉交離署之人照中樞政考不交與
接班之人曠班例罰俸一年推諉不接班之人
照推諉例罰俸一年私離官署者照擅離職役
律罰俸九月再各衙門有直宿官員其各司署
內有失火賭博酗酒鬪毆竊失等項失於防範

覺察應將該司直宿官照見議直月官例議處
直月官免議如不繫各官署內及該衙門原無
直宿官者直月官仍照例議處其各衙門設有
管庫管獄等官者一應庫獄地方是其專責該
管官經管直月官免議再各衙門官署損壞以
及皂役人等酗酒鬪毆賭博等事皆繫首領官
專責直月官止繫夜間巡防約束如繫白晝失
察應將首領官照例議處直月官免議夜間失

察仍責直月官

一筆帖式臨考規避乾隆四年議準見任筆帖式遇三年應行考試之期臨考規避察明實繫無故不到者革職

一教習不實心訓導乾隆四年議準各旗義學教習如有因循苟且不實心教授以致有誤學生經該處叅奏者將該教習照教官因循苟且不嚴加考試例革職

一稽誤時憲書進呈康熙十五年議準官員不會推時憲書承認會推以致有稽進呈者革職永不叙用

一撫綏無術康熙七年議準督撫繫封疆大吏該省百姓如有困苦流離失業拋棄田地徭賦難輸地方毫無治理者或被部院或被科道糾叅如果情實將該督撫革職該管司道府官亦革職若各屬州縣等官不行釐剔陋弊不舉行

便民之利以致百姓不安生業地方困苦者督撫司道府等官訪察題叅將州縣等官草職

一虛懸城守康熙六年題準官員因公事將城守倉獄事務交與不應交之人而去者罰俸一年如上司將城守官員不輪流傳喚盡行傳去以致城空者亦罰俸一年

一規避移駐雍正六年遵

旨議定凡委官駐劄地方經督撫題準該員仍戀居城

邑不即移駐者將該員照規避革職如該管之
地方官聽其規避不行詳報及督撫司道等官
不行揭叅者將該管地方官降二級調用司道
府等官降一級調用督撫降一級留任如該管
官及司道府等官已經揭報而督撫不行題叅
者將督撫降一級調用其揭報之官免議

營私

一餽送囑託康熙九年議準官員因事夤緣餽

送禮物發覺之日與者受者皆革職如餽送雖未收受不行出首後經發覺者將不出首之官罰俸一年○又議準官員縱容親友在任所招搖詐騙者革職失於覺察者降一級調用○十五年議準官員將上司衙役索銀之事受囑徇隱不報者革職○十七年覆準府州縣等官並無公事謁見逢迎並赴省拜壽行賀夤緣通賄餽送銀錢等物者皆照餽送禮物例處分○又

議準督撫差內使人等妄藉訪事為名遍逾州縣並督撫布按自開便門令官役人等出入傳事者革職○又議準官員將游客星卜及優伶人等或留住省城或轉送各府州縣致擾害地方及在京官員貽書薦送者將薦送之官皆照親友招搖詐騙例革職○十八年議準內外官員除繫至親平日往來外如督撫司道州縣等官赴任時謁見在京大小各官或自任所差家

人及子弟提塘人等來往行走者草職大小官員不行自首者亦草職至督撫司道府州縣等官家人子弟提塘往在京大小各官家人家下行走其主知者草職將家人寬免其主不知者降二級將兩家家人皆交刑部治罪提塘有職者草職無職者亦交部治罪其在京大小各官拜見督撫司道府州縣等官餽送裘馬等物及差人至督撫司道府州縣等官任所若督撫司

道府州縣等官不行舉出將餽送差人之大小
各官及不行舉出之督撫司道府州縣等官亦
皆草職如督撫司道府州縣等官向在京大小
各官因事營求或諂媚求譽餽送禮物者將餽
送收受之人皆草職拏問地方官吏於民間正
項錢糧之外濫收苛派諂媚餽送大小官員者
將餽送收受之人亦草職拏問○十九年議準
上司與州縣借貸等弊發覺者照貪官例草職

○二十五年覆準科道官員如果有關

國家大事令其陳奏有貪惡者應據實指叅其有
希圖利己及允受囑託妄行引奏結交朋黨作
姦誣陷者事經發覺草職治罪其告假終養丁
憂之科道官員有不安分自守包攬錢糧干預
辭訟侵害小民並遍游各省生事晉謁督撫挾
詐有據者令該地方官申報督撫題叅將本官
亦行草職治罪如該地方官隱匿不行申報者

降二級調用該地方官既報督撫督撫徇庇不行糾叅者將督撫降一級留任○三十七年覆準上司藉訪事為名家人衙役更番迭出陽稱路過陰言採訪抑勒州縣餽遺進奉者革職如州縣官揭報督撫督撫徇庇不行題叅許該員開具實跡密封竟達通政使司奏

聞事實將該督撫照徇庇劣員例降三級調用○雍正四年奉

旨官員因事囑託事發者草職○七年議準凡官員與本地紳衿除慶賀

萬壽宣講

聖諭舉行鄉飲及一切公事禮節彼此接見拜往毋庸禁絕外如新選官員有本處之人在京餽送禮物投拜門生者令五城御史及順天府稽察題叅繫官草職候選之員草去職銜貢監生員草去衣頂如新選官利其所贈即與交通往來受

其投拜者草職自行出首者免議若官員未入境時本地紳衿差人持帖遠接交界到公館排席迎風到任後私相餽送及拜為門下聯為宗誼本官不行禁革反行收受禮物私相交結者皆照在京交往餽送例察議其上司與所屬官私相交結往來餽送者亦照此例處分州縣各官令道府稽察道府各官令督撫兩司稽察如州縣官有私相交往餽送情弊而道府不行揭

報將道府照徇庇例降三級調用府道等官有私相交往餽送情弊而督撫兩司不行揭報題叅者將督撫兩司照徇庇例降三級調用○十年覆準上司勒薦幕賓長隨許屬官揭報將勒薦之上司照將游客優伶人等轉送各府州縣例草職或屬官徇隱不行揭報者照受囑不報例草職若屬官營求上司因所薦幕賓長隨有勾通行賄等弊照夤緣餽送例分別議處○

乾隆五年覆準凡在京官員與至親切友同鄉
世誼往來慶弔原於名節無關設或請託公事
瞻徇情面亦不論其為何等之人皆干嚴例至
或家貲富厚有意結交朝紳計圖光寵其朝紳
素無往來情分濫行納結希圖肥潤此等結交
並經發覺者照不謹例革職

一供應

欽差康熙十九年議準州縣官員藉送奉

旨所差大臣官員下程科斂百姓者照貪官例革職
提問其督撫司道府廳等官皆照失察貪官例
分別處分○雍正元年

諭欽差出京沿途地方官向有餽送督撫派於州縣州
縣派於里民朕深知此弊於散振催漕看河各欽差
大臣官員出京時皆逐一諄諄告誡不令騷擾地方
官民但恐陽奉陰違又恐地方官畏懼怨畧欽差之
愆仍蹈前轍且差去之大臣官員即能潔已自持隨

從人役未必盡能遵奉至欽差事畢回京之後督撫
或藉欽差公費名色開單分派州縣州縣不敢問其
虛實州縣轉派里民里民不敢爭其多寡甚至以科
派贏餘或填虧空或充節禮種種弊端深可痛恨著
各省督撫於欽差經過之地即將所發上諭大張告
示遍諭通衢嗣後欽差務期恪遵訓諭嚴束人役毋
得騷擾地方需索餽送如欽差本無需索州縣官藉
名私派里民及暗加火耗者著即指名題叅至督撫

身為大吏尤宜廉潔率屬倘有扶同科派致擾民生者一經察出決不姑貸欽此○乾隆二年奏準凡

欽差督撫及一切上司經過地方止許佐貳等官於城門驛亭迎送正印各官非有公事傳詢不許輕率出城亦不許蟒衣跪道各學教職率領文武生員迎送一例禁止○又議準

欽差上司經過地方各官有意諂媚違例迎送或因事營求或乘便賄賂照諂媚求譽例革職如止

違例迎送無營求賄賂等情照擅離職役律罰俸九月若

欽差及各上司必欲地方官遠迎遠送並令印官出城迎送致各官畏其威勢違例迎送者如有勒索情弊或被詳揭或經督撫察叅照勒索下屬例草職提問如止令迎送無勒索情弊將

欽差及各上司照城守官員盡行傳去例罰俸一年地方官皆免議又安置公館呈送下程酒席及

供應夫馬車船一切陋規皆嚴行革除如地方官仍有供應及

欽差上司仍有勒索者皆照餽送禮物例革職若督撫不行察叅照徇情例降二級調用其

欽差及各上司隨役家人私自索取本官不知情者照失察衙役犯贓例分別議處如繫知情故縱則與本官求索無異罪坐本官應革職治罪其隨役家人一并交與刑部按律究擬並許被索

之人據實詳揭若濫行供應者照濫給例降一

級調用倘

欽差及各上司因不迎送供應別尋他事中傷者審
虛將挾嫌中傷之人降二級調用

書役

一書役

國初定凡在外大小各衙門有侵剋錢糧婪贓遇
赦免罪之衙役如復入衙門著役被傍人出首者將

復令入役官以知情縱令論草職若有百姓告發或傍人指摘督撫題叅降一級留任如非本任內草役不行察出收用者本官降一級調用其不察叅之督撫罰俸一年○康熙十四年題準在京部院衙門書辦指稱本司事件犯賊將本犯照律治罪外贓數至十兩以上者將該司官員降一級留任不及十兩者罰俸一年如各員有知情縱令作弊者草職有扶同營私婪贓

者照貪官例草職提問○又題準凡正身衙役及額定貼寫幫差之外有白役隨所差衙役嚇詐未經察出之官罰俸六月若官員知繫白役於定數之外濫留應役發牌票差遣公事婪賊累民按其所犯賊數一兩以下者將本官降一級調用一兩以上者降二級調用十兩以上者草職○二十五年題準衙蠹害民令督撫訪拏司道府州縣等官舉報若司道府州縣等官不

報上司照徇庇例降三級調用不行題叅之督撫罰俸一年其訪拏衙蠹並贓私數目年終造冊題報○雍正四年覆準各衙門考取書辦細加察覈毋致有冒籍冒姓頂替諸弊其書役投充時務遵照定例取具確實親供印甘各結方準著役如無原籍地方官印結者不得收用其年滿送部考職之時各衙門於咨內填寫並無假姓冒籍字樣本部方準收考若有冒籍冒姓

等弊事發本人革去職銜照律治罪其不能稽
察之該管官照失察例罰俸六月○又覆準凡
額設書役年滿出闕該管官員慎擇僉點取具
鄰右及親族並無重役買闕等弊連名保結方
準收錄該管官員加具印結申報上司衙門存
案如有暗行頂買索取租銀之處將該管官員
革職闕主人等按律治罪倘督撫陽奉陰違不
除積弊將該督撫照徇庇例降三級調用○七

年議準外省府州縣各衙門書役投充務取具
並無重役冒充親供互結該地方官加具印結
彙造役冊申送該管稽察衙門方準著役每於
年終該役出具並無過犯連名互結地方官加
具印結申送該管道員衙門

如無巡道地方責成守道無道員地

方責成按察使令其專管稽察

倘有五年役滿不退者將該役

斥革治罪或舞文弄法招搖撞騙包攬辭訟侵
欺錢糧者該司道訪拏按律治罪府州縣官不

行察出照徇情例降二級調用專管司道不行
察出失察一二名者罰俸三月失察三四名者
罰俸六月失察五名以上者罰俸一年失察十
名以上者降一級留任其司道鹽道關差書役
責成督撫稽察督撫及總河總漕鹽院書役令
各自行稽察如失察者皆照司道例處分書辦
有指官撞騙招搖作弊平民畏其本官庇護不
敢控告者許赴該管稽察衙門控告事實按律

治罪○又議準外省衙門草退書吏將緣事情
由及草退日期一并注明詳報督撫一經犯事
發覺草前草後不難按冊稽覈如犯事吏役冊
上無名將該管官照造冊遺漏例議處如規避
失察捏稱草役在先犯事在後經督撫察出題
叅者將該管官草職○又議準在京部院等衙
門闕主如仍有潛匿

京師及附近州縣地方者事發將該管地方官失

察一名者降一級留任二三名者降一級調用
四五名者降二級調用六七名以上者革職有
能實力奉行拏獲一名者紀錄一次二名者紀
錄二次三名者紀錄三次四名以上者加一級
至有罪書吏遞回原籍之後仍潛入

京師及附京州縣地方者事發亦將該地方官失
察一二名者罰俸六月三四名者罰俸一年五
六名者降一級調用有能拏獲二名者紀錄一

次三四名者紀錄二次五六名者紀錄三次十名以上者加一級○八年議準在外大小各衙門有鄉紳奴僕承充書役者該督撫轉飭該管地方官察明革除取具並無宦僕充當書役印結彙齊送部存案凡充補書役皆確覈實非宦僕取具鄰里押結地方官加具印結送上司報部存案倘有實繫宦僕捏稱農民充當其主知而不行首明者照徇庇例降三級調用○又遵

旨議定各省衙役犯贓本官知情故縱者照縱役犯
贓例革職其止於失察實無知情故縱者照在京
部院司官之例十兩以上者將該管官降一
級留任不及十兩者罰俸一年令各省督撫於
題叅疏內將本官或繫知情故縱或繫失於覺
察詳悉聲明分別議處○十一年議準凡各衙
門官員如有聽信請託將役滿及革退書役聽
其更易姓名改移籍貫濫準入冊及掛名曠役

營求批准等弊別經發覺如繫役滿草退書役
本官明知故縱濫準入冊將該本官照草役復
入衙門例草職其役滿草役本官實不知情止
繫一時失察準其承充者降一級調用如繫掛
名曠役營求批准將該本官照徇庇例降三級
調用倘前官將役滿草退書役及掛名曠役濫
準承充接任官未經察出揭報經上司察出如
繫役滿草退書役將未經察出之接任官降一

級調用如繫掛名曠役營求批准將未經察出之接任官降一級留任○十二年議準各部院衙門役滿書吏於考定職銜後即著五城司坊官限一月內令其回籍倘司坊官將冊內有名之人不行催令回籍容留在

京城並復行來京潛住將容留之司坊官照容留廢官例按名數分別議處其各部院衙門責草書辦亦交與該司坊官嚴催令於一月內起程

回籍並行文本籍地方官嚴行管束如潛住

京城將容留之司坊官亦照容留廢官例議處倘
實繫失於覺察以致役滿逗遛或業經催令回
籍後來京潛住者照失於覺察例罰俸一年其
籍隸大宛二縣者令該縣將各役年貌住址三
代墳墓造冊咨送都察院令該城御史按冊確
察果繫本

京籍貫有墳墓房產可據者仍準其照例居住其

非實在大宛籍貫倘有潛住招搖等弊經該御史察出將濫送冊結之知縣照造冊舛錯例罰俸一年如該城御史不行察出一經發覺將從前失察之該御史照不行詳察例罰俸六月○乾隆元年覆準在京各衙門書吏額闕務令承充之人報明實在籍貫取具同鄉書吏保結將原籍何處並見在居址地方三代姓氏於結內詳悉聲明該衙門務於十日內即照保結內所

開籍貫居址三代姓氏咨行吏部轉行各該省
督撫嚴飭該地方官於文到日照例出具印結
並取具鄰族人等甘結照各省地方遠近順天
府定限四十日直隸奉天山東河南等省定限
三月江蘇安徽江西浙江湖北湖南陝西甘肅
等省定限四月福建四川廣東廣西雲南貴州
等省定限六月務於所定限內將印甘各結咨
送到部轉送各該衙門以結到之日準其著役

仍令該督撫飭令該管上司稽察如該地方胥吏人等抑勒遲延不依限出結者除將勒索之書吏計贓治罪外仍將該地方官照失察衙役犯贓例分別議處若繫該地方官抑勒遲延即將該地方官照抑勒遲延例降二級調用如無抑勒情事遲延者仍照事件遲延例議處該管上司不行稽察督催照督催不力例罰俸六月倘有外省書吏捏稱大宛二縣土著之民該地

方官不行詳察朦朧出結將濫行出結之地方
官照頂冒出結例革職○二年議準各衙門於
正額書役並酌增之貼寫幫役外復行多留者
降一級留任○四年奏準在京各衙門吏役犯
贓該司官員失於覺察及後雖經自行訪出而
承辦案件已屬錯誤者仍照例分別議處其有
案件並無舛錯而書役在外指騙得贓該司司
官能首先訪出究治準其紀錄二次其會同稟

究之同司各官亦免其議處○五年奏準在京各部院衙門書吏凡外省府州縣民人充役者若繫各衙門事簡書吏及宗人府律例館供事統竝五年役滿該衙門咨部考職由部彙至三月考試一次考試之後即將該書吏姓名籍貫造冊咨送都察院轉交五城司坊官務令一月內回籍取具印結送院存案仍行文該書吏原籍督撫取具地方官到籍日期印結送院備案

至內閣即用供事及各部院衙門繁闕即用書吏亦於役滿之後該衙門出具考語咨送到部掣定職銜照例行文該衙門飭令回籍其中有情願簡選人員該書吏呈明本衙門咨送到部照例三月簡選一次簡選之後亦即將該書吏姓名籍貫造冊咨送都察院轉交五城司坊官亦限一月內令其回籍

欽定大清會典則例卷十四